

Vun driweriwer

erscheint auf www.lenauheim.de

monatliche
Erscheinung

Februar 2017

von Helen Alba

Kocherei in Zehn-Liter-Tippe

Wie ich eich schun verzählt han, ware mer iwer die Winterfeiertäch in Deutschland bei unser Kinner. Die ware stark froh, mol wieder so richtiches schwowisches Esse ufgetischt zu krien. Un ich han alli Händ voll zu tun ghat, weil ich tachtäglich in große Tippe un Phanne gekocht han – for siewe Persone. Erscht han ich mich derbei umstelle misse, weil ich jo derhem johrelang nor for zwaa Leit koche tu.

De erschte Wunsch ufm Kichezettl ware Krumber un Nudle. Noh em Koche so gut kerschtlich anbrode un dernoh Aijer derdriwert schlaan, mit dicker Milch derzu – ja, do han se gschlemmt. E Tach druf han se nochmol des Gericht han wille, weil's am erschte Tach knapps ausgang is. Un saan kann ich, dass ich in drei Wuche fünf Mol Krumber un Nudle gekocht han. Zwaamol Krumber un Kneedle, dreimol Schmorre un viermol Palatschinke. Des anri, des ware Fleischtäch: Supp un Fleisch, Rippepapriskasch, Bradl un Salat....

Un sicher gfilltes Kraut. Des Sauerkraut han ich vun derhem mitghol ghat. Erscht han ich 80 Kneedle gewickelt. Do denk ich, des werd zu wenich sin iwer die Täch. Un han e zweite Tippe mit nochmol iwer 70 Kneedle vorbereitet. Es war ach gekoschte Worscht un Schungehees derbei – bis die Weihnachte rum ware, ware ach die Tippe leer.

An Silvester hats dann Sulz gin, Faschiertes un Schweinebraten mit Krumbersalat. Ach gfillti Aijer un Beffsalat sin ufgeess gin. Un ich han wieder anfang gfilltes Kraut zu mache. Doch desmolrum for ingfrierte, dass se dervun han, wann se wieder leenich sin. Also grad for 150 Kneedle war Platz im Gfrierfach. Ich wills gar nit wisse, doch ich sin mer bal sicher, dass jetzer dorte nimi vill drin is.

Un wie mer wieder derhem ware, do ment mei Mann: „Ich han stark Gusta uf gfilltes Kraut! In Deutschland han ich nor verkoscht dervun, dass de Kinner meh bleibt“! Also han ich vun vore anfang zu wickle. Doch in Moße!

Die Geischerstund

Jetzt will ich ach noch verzähle, wies uns in der Nacht ergang is, während unsres Aufenthalts in Deutschland. Mir han in der Wohnung meiner Eltre (die noh ihrem Ablewe nit weiter vermiet gin is, for dass Platz genuch is, wann Gäscht kumme) gschalt un gewalt. Also ach gschloft. Aus Gewohnheit gehn mer immer geger elf Uhr ins Bett. Mit dere anri Uhrzeit dorte, han mer um zehn Uhr schun anfang zu gabse un sin ach bal dernoh im Schlofzimmer verschwunn. Ans Bett han mer uns jo nit gewehne misse, weil mer schun oft genuch bei anri Bsuche drin gschloft han. Noch e bissl Musich ghorcht, dann es Radio abgestellt un ingschloft.

Ufmol sin ich vun eem Kloppe wackrich gin, han mei bessri Hälft nit steere wille, sin an die Tier (weil ich gement han, ens vun de Kinner, die im Haus gleich newedran wohne), will uns noch was saan. Ich ruf schun ausm Vorzimmer, dass ich kumm. Reiss die Tier uf – ke Menscheseel war zu gsiehn. Im erschte Dusel han ich gement, des Kloppe sei puri Inbildung gewenn. Also sin ich nochmol ins Bett gschluppt un han mer gedenkt, ich wer mich jo verheert han. Kaum war ich ingegummt, wieder des gleichmäßichi Kloppe. Jetzt han ich mei Mann gebeidelt. Verschloft wie er war, hat er gfroot, obs schun Morjet is. Ich saan: „Ich weess nit, es kloppt eener. Doch an der Tier is kenner! Kummt mer doch spanisch vor. Hascht nix gheert?“ „Nee. Werscht jo geträmt han!“ Doch for mich war die Nacht nimi so ohne. Ich han ständich druf gewart, dass es wieder kloppt un han nit inschlofe kenne. Doch gekloppt hats nimi.

Bis in der Nacht druf. Jetzt hat ach mei Mann des Kloppe gheert, is an die Tier – nix. An Geischtre glaawe mer zwar nit, doch wer kloppt mitte in der Nacht rum? Mer soll doch kenne beim Schlofe steere. Am anre Tach han mer des de Kinner verzählt. Die han uns beruhicht: „Des Kloppe kummt aus der Wohnung vun owe. Die Nochberin dorte, die hat e Hund. Un der kloppt mitm Schwanz an de Schank, wann er Hunger oder Dorscht hat! Macht eich nix draus un gwehnt eich dran“! Leicht gsaat. Mir han uns zwar nit dran gewehne kenne, doch han mer jetz gewisst, dass de Nochberin ihre Hund de Urhewer is.